

# კავკასიის უნივერსიტეტის აკადემიური კეთილსინდისიერების კოდექსი

## ზოგადი დებულებები

წინამდებარე კოდექსი შექმნილია, განსაზღვრავს და არეგულირებს კავკასიის უნივერსიტეტის წევრების აკადემიურ კეთილსინდისიერებასთან დაკავშირებულ საკითხებს და აკადემიური კეთილსინდისიერების პრინციპების დარღვევისათვის ადგენს შესაბამისი პასუხისმგებლობის ზომებს.

აკადემიური კეთილსინდისიერების კოდექსი ვრცელდება სტუდენტებსა და აკადემიურ, სამეცნიერო და მოწვეულ პერსონალზე.

## ძირითადი პრინციპები

კავკასიის უნივერსიტეტის თითოეული წევრისათვის აკადემიური კეთილსინდისიერება წარმოადგენს მთავარ ღირებულებას.

აკადემიური კეთილსინდისიერება გამოხატულია კავკასიის უნივერსიტეტის წევრების ყოველდღიურ საქმიანობაში: სწავლაში, სწავლებასა და კვლევაში.

აკადემიური კეთილსინდისიერება ეფუძნება პასუხისმგებლობის, პატივისცემის, ნდობის, სამართლიანობის და ღირსების შეგრძნებას აკადემიურ საქმიანობაში.

წინამდებარე კოდექსი ხელმისაწვდომია უნივერსიტეტის წევრთათვის. აკადემიური სივრცის თითოეული მონაწილე ვალდებულია დაიცვას კოდექსის პრინციპები. აკადემიური კეთილსინდისიერების პრინციპების დაცვა მკაცრად კონტროლდება უნივერსიტეტის ადმინისტრაციის მიერ.

კავკასიის უნივერსიტეტი ხელს უწყობს აკადემიური კეთილსინდისიერების შესახებ ცნობიერების ამაღლებას და გაზიარებას საზოგადოების წევრებს შორის.

საზოგადოების წევრები თანხმდებიან, რომ საუნივერსიტეტო საქმიანობაში დაუშვებელია აკადემიური თაღლითობა, ტყუილი, პროფესიული გულგრილობა და პლაგიატი.

## ცნებების განმარტება

**აკადემიური თაღლითობა** - სტუდენტის ან სწავლების პროცესში მონაწილე სხვა პირის მიერ საკუთარი თავის წარმოსაჩენად გამიზნული, არაკეთილსინდისიერი ქმედების ჩადენა:

- აკადემიური ნაშრომის ან რაიმე სხვა სახის მასალის (სტატისტიკური მონაცემები, ლაბორატორიული კვლევის შედეგები, ვიდეო-აუდიო მასალა და სხვ.) ავტორის ნებართვის გარეშე წვდომა, მოპოვება, გამოყენება ან/და გავრცელება;
- შეფასების მისაღებად სხვა პირის ძველი ნაშრომის გამოყენება;

- დახმარების უნებართვოდ გაწევა და მიღება (კარნახი, ლექტორის მიერ სტუდენტისთვის საგამოცდო დავალების ნიმუშის მიწოდება და ა.შ.);
- სხვის მაგივრად ნაშრომის ან დავალების შესრულება რაიმე სახის სარგებლის მიღების მიზნით.

**ტყუილი** - განზრახ არასწორი ინფორმაციის მიწოდება აკადემიური მოთხოვნების დაკმაყოფილების გასაადვილებლად ან სხვა პირებთან შედარებით უპირატესობის მოსაპოვებლად:

- ავადმყოფობის ან სხვა მიზეზის მოგონება შეფასების ან/და სხვა სარგებლის მისაღებად;
- მონაცემების, წყაროების ან ინფორმაციის გაყალბება;
- გამოცდის გაცდენის მიზნით არასწორი ინფორმაციის მიწოდება;
- ოფიციალური მიმოწერის გაყალბება;
- ავტორისათვის ისეთი აზრის მიწერა, რომელიც მას არ გამოუთქვამს.

**პროფესიული გულგრილობა** - აკადემიური პერსონალის მიერ პროფესიული ვალდებულებების უგულებელყოფა, რაც გამოიხატება დაუდევრობით ან/და გულგრილობით სტუდენტების ან კოლეგების მიმართ.

**პლაგიატი** (აკადემიური სიყალბე) - სხვისი იდეების ან ტექსტის გამოყენება საკუთარი სახელით, წყაროს მითითების გარეშე.

#### პლაგიატის სახეები

- პირდაპირი პლაგიატი (წყაროდან სიტყვა-სიტყვით გადმოწერა ციტირების ან სხვა ტიპის მითითების გარეშე);
- თვითპლაგიატი (საკუთარი მოსაზრებების გამეორება მითითების გარეშე);
- მოზაიკური პლაგიატი (სხვადასხვა წყაროდან აღებული მოსაზრებების გაერთიანება, როდესაც არ ხდება ცალკეული ავტორების მითითება);
- შემთხვევითი პლაგიატი (კვლევის საწყის ეტაპზე დაუდევრობა, თუმცა შედეგის გამო ისეთივე დარღვევაა, როგორც გამიზნული პლაგიატი).

#### პლაგიატის თავიდან არიდება

პლაგიატის თავიდან არიდების მიზნით, აუცილებელია:

- მიუთითოთ გამოყენებული ინფორმაციის ზუსტი წყარო;
- აღნიშნეთ იმ ადამიან(ებ)ის დამსახურება, ვინც დაგეხმარათ წერილობითი ნაშრომის შესრულებაში;
- გამოყენებული ციტატები ჩასვით ბრჭყალებში, წყაროს ზუსტი დასახელებით;
- არ გამოიყენოთ ინტერნეტში განთავსებული მასალები მითითების გარეშე;
- ავტორის იდეების პარაფრაზირებისას პარაფრაზი განსხვავდებოდეს ორიგინალისგან ენობრივად, თუმცა იმეორებდეს ძირითად აზრს;

- საკუთარი, უკვე გამოქვეყნებული მასალის ციტირებისას გააკეთოთ შესაბამისი მითითება.

### პლაგიატის პრევენცია

აკადემიური კეთილსინდისიერების დაცვის მიზნით, კავკასიის უნივერსიტეტი ახორციელებს თანმიმდევრულ პოლიტიკას აკადემიური კეთილსინდისიერების შესახებ ცნობადობის გასაზრდელად.

პლაგიატის პრევენციის მიზნით, კავკასიის უნივერსიტეტში, პირველი და მეორე საფეხურის საგანმანათლებლო პროგრამების ფარგლებში, სავალდებულო საგნის სახით ისწავლება აკადემიური წერა. საბაკალავრო საგანმანათლებლო პროგრამებში აკადემიური წერის სასწავლო კურსის შეთავაზება ხდება სწავლების პირველ ან მეორე ეტაპზე, ხოლო მაგისტრატურის საფეხურზე - სწავლების პირველ ეტაპზე.

პასუხისმგებლობა აკადემიური კეთილსინდისიერების პრინციპების დარღვევაზე

სანქციები სტუდენტების მიმართ:

- გაფრთხილება;
- ნაშრომის/საგამოცდო დავალების განმეორებით შესრულება;
- ქულის დაკლება;
- შესაბამისი სასწავლო კომპონენტის უარყოფითი შეფასება (ნაშრომის განულება);
- სასწავლო კურსში უარყოფითი შეფასება (F);
- სტუდენტის სტატუსის შეჩერება ერთი სემესტრით;
- სტუდენტის სტატუსის შეწყვეტა;
- მოპოვებული ხარისხის ჩამორთმევა.

სანქციები აკადემიური/სამეცნიერო/მოწვეული პერსონალის მიმართ:

- საყვედური პირად საქმეში;
- მონიტორინგის დაწესება მის საქმიანობაზე;
- შრომის ანაზღაურების დაკავება;
- შრომითი ხელშეკრულების შეწყვეტა.

აკადემიური კეთილსინდისიერებისა და დისციპლინის დაცვის მუდმივმოქმედი კომისია

აკადემიური კეთილსინდისიერების პრინციპების დარღვევის ფაქტებს, მიმართვის შემთხვევაში, შეისწავლის აკადემიური კეთილსინდისიერებისა და დისციპლინის დაცვის მუდმივმოქმედი კომისია და ამზადებს შესაბამის დასკვნას.

აკადემიური კეთილსინდისიერების საკითხების განხილვის დროს, კომისიის შემადგენლობაში წარმოდგენილი უნდა იყოს განსახილველი დარგის/მიმართულების აკადემიური პერსონალი. კომისიის მუშაობის წესი განისაზღვრება აკადემიური კეთილსინდისიერებისა და დისციპლინის დაცვის მუდმივმოქმედი კომისიის დებულებით.

დარღვევის ფაქტის დადასტურების შემთხვევაში, დარღვევის სიმძიმის გათვალისწინებით, დამრღვევი პირის მიმართ გამოყენებული იქნება შესაბამისი სანქცია. აკადემიური კეთილსინდისიერების დარღვევის ერთი ფაქტის მიმართ შესაძლებელია გამოყენებულ იქნას პასუხისმგებლობის მხოლოდ ერთი ზომა.

#### აპელაცია

პირს, რომელიც არ ეთანხმება აკადემიური კეთილსინდისიერებისა და დისციპლინის დაცვის მუდმივმოქმედი კომისიის დასკვნას, უფლება აქვს დასკვნის გაცნობიდან არაუმეტეს 2 სამუშაო დღეში წერილობით მიმართოს უნივერსიტეტის პრეზიდენტს და მოითხოვოს საკითხის აპელაცია.

აპელაცია უნდა იყოს დასაბუთებული: მასში მკაფიოდ უნდა იყოს მითითებული გასაჩივრების საგანი და არგუმენტები ნათლად ჩამოყალიბებული. ზოგადი ხასიათის აპელაცია არ განიხილება. გადაწყვეტილება აპელაციის განუხილველად დატოვებაზე საბოლოოა და გასაჩივრებას არ ექვემდებარება.

უნივერსიტეტის პრეზიდენტი სააპელაციო განაცხადის მიღებიდან 3 დღის ვადაში ქმნის დროებით სააპელაციო კომისიას. სააპელაციო კომისიის შემადგენლობაში არ შეიძლება იყოს აკადემიური კეთილსინდისიერებისა და დისციპლინის დაცვის მუდმივმოქმედი კომისიის წევრი. სააპელაციო კომისიის გადაწყვეტილება საბოლოოა.

#### მონაცემების შენახვა და ანგარიშგება

აკადემიური კეთილსინდისიერების პრინციპების დარღვევის შესახებ ინფორმაცია ინახება სტუდენტის ან აკადემიური პერსონალის პირად საქმეში. ჩანაწერები კონფიდენციალურია და მხოლოდ დაკავშირებული პირისთვის არის ხელმისაწვდომი. მისი თანხმობის გარეშე, უნივერსიტეტს უფლება არ აქვს გასცეს ინფორმაცია მესამე პირებზე.